

四庫全書

集部

欽定四庫全書

集部

三華集卷一至四

詳校官中書臣瞿照

助教臣常循覆勘

總校官進士臣朱鈺

校對官修撰臣吳錫齡

謄錄監生臣劉廷勲

欽定四庫全書

集部八

三華集目錄

總集類

綠苔軒集六卷

種菊庵集四卷

錦樹集八卷

臣等謹案三華集十八卷明無錫錢子正及

弟子義姪仲監合刻詩也子正綠苔軒集六

卷前有王達善序子正義種菊庵集四卷前有

洪武八年自序仲益錦樹集八卷前有魏驥
序三集初各自為書正統中仲益族子公善
等始合而刻之其曰三華者蓋以三者皆錢
氏英華也按子正詩朱彞尊明詩綜不載但
附見其名於子義之下然二人出處始末均
無可考獨仲益以元末進士知華亭縣後為
翰林脩撰見於魏驥序中而明詩綜載仲益
永樂初以翰林編脩轉周王府長史與驥序

互有異同又稱仲益詩格爽朗惜遺集罕傳
予從秦對巖購得亟錄八首猶未盡其蘊云
云然則彝尊僅見仲益遺集未見斯本也蓋
亦罕覲之笈矣乾隆四十五年七月恭校上

總纂官

臣紀昀
臣陸錫熊
臣孫士毅

總校官
臣陸費墀

[illegible]

欽定四庫全書

三華集卷一

明 錢子正 撰

綠苔軒集一

古人之為詩非汲汲為欲傳後而為之也或古今
事物之臧否或風俗習尚之淳漓或卉木虫魚之
細山林沼沚之幽凡觸於目而動之於心自然發
之於詩而託之於筆至或激揚振導而有益於學

者之身關於世教則人自相稱道而爭為之傳矣
夫豈尚乎意象之恍忽辭語之雕鏤規模之繪飾
哉吾觀子正錢先生詩所謂不求傳而自傳者也
昔先生雖以貴雄一郡惴惴寡言惟事經史聞人
一善若出諸已仁厚廉節保而弗遺故其為詩不
獨挾飛霞斲明月怡然於萬物之表而已矣且關
於世教而有警於澆沴之俗焉若曰天性不可奪
恩愛情迺使若曰片言大義重一笑黃金輕此皆

卓然可見不為世之清濁而廢德者也嗚呼先生之詩曷得而弗傳耶譬猶梁之結綵固不求於貴也而自不能不貴豐之太阿固不求於彰也而自不能不彰天蓄至寶夫豈荒陬穢壤所得而湮滅哉先生之嗣叔達猶子仲益相與纂次成集俾予序之余託交於子姪之間承風接響者非一日矣姑述其槩而為之序且使後生晚學讀先生詩而有所警惕焉洪武二十四年七月既望耐軒王達

善序

七言律詩

飲仲毅姪家

採菱溪上雨初收，與客重來憶舊游。
歲月不知人事改，湖山都是古今愁。
百年夢幻催華髮，萬頃煙波愧白鷗。
此日阮家賢叔姪，竹林猶似晉風流。

燈花

一枝芳艷發長檠，不假栽培火煉成。
上苑未諳春日煖，

深閨長怯曉天明閒敲碁局元無意懶剔銀缸似有情
見說謝娘眉懶日玉釵臨鏡撥殘英

次陳思道話舊韻

當時日日醉江邊花逕聯鑣柳港船往事百端從別後
重逢一笑似生前語連新舊停盃酒情到曾懷勝管絃
獨訝潁川門下士向來珠履可無賢

春雪

舊聞春雪不稱瑞今歲深春四白過頗訝違時憎凜冽

亦知變候失陽和
巡簷樹作真瓊榦
繞屋山為假玉坡
莫怪向來羔酒客
暮寒如許奈君何

閒居有感

日落悲笳吹客愁
荒村頗覺久淹留
曾無過客能回馬
時有牧童來問牛
先壟遠瞻山北向
歸心常共水東流
天涯稚子經年別
何處西風擁敝裘

湖上有感

澤國風高常日陰
離居有客動鄉心
坐看急景催殘臘

直把窮愁伴苦吟
天上故人書久絕
枕中歸夢路難尋
武陵溪上漂零者
誰致滄浪萬里音

久客

朔風吹冷夜沉沉
煨芋鑪寒擁敝衾
遠路未歸為客夢
閉門慣學坐禪心
長拋骨肉天南北
欲訪交游事古今
那得一樽澆壘塊
莫嗔華髮苦相侵

客中初度

五十餘齡一病身
又逢殘臘紀生辰
去年座上盃行酒

此日天涯淚滿巾書問每題為客恨交游應悉未歸貧
遙知慈母占烏鵲幾向兒童說遠人

感懷

彈鋏歸來卧草堂暫教清夢到羲皇過門却笑貧原憲
裹飯誰尋病子桑萬里獨憐鵬鷃健百年行復鬢毛蒼
天涯骨肉漂零盡不報平安字兩行

又

未辦三重屋上茅西風吹樹欲傾巢無文不暇驅窮鬼

有論方當廣絕交骨肉已成垂死計餘年盡作等閒拋
故人今雨無消息愁對寒菹薦晚庖

戲調仲珉

西澣溪邊楊子宅主賓懷抱昔俱開賓從斟酌主自睡
主不招呼賓復來即今耆舊那再得如此風流安在哉
盡說郎君亦清快可曾攜酒慰風埃

重經石塘

時荷花
盛開

何處放懷消百憂石塘橋畔可維舟荷香恰似臨平路

草色渾疑謝朓洲莫管鬢毛催老大但逢樽酒盍淹留
恨無健筆題詩句辜負湖山此勝遊

孟明復歸錫山

簪笏相承十世餘西神重理舊枌榆山輝原抱崑岡玉
川媚知還合浦珠丘壘再瞻誠孝本材華咸許應時須
莫將小隱驚華髮東閣方今要漢儒

牡丹

聞道開元始見誇當時紅紫總輸他郭駝解栽數十種

野鹿曾啣第一花不獨昔年稱富貴只今凡卉讓豪華
洛人三月如狂客日醉姚家與魏家

得常德子原炳書

有客起舵春江流寄來遠書消百憂開緘密密寫何事
問我棲棲應白頭淚眼恰從秋後暗柔腸新結病中愁
幾時掛劍歸湖上爾把耕犁我飯牛

德潤齋兄亂後還故里

向來蹤跡寄吳門歸夢應憐湖上村此日到鄉雙鬢改

百年喬木幾家存
曉留太白明逾切
毀剩靈光道益尊
莫笑新吟苦
迂闊對牀風雨要評論

喜雨

五月五日雨翻盆
大堤傾瀉溪流渾
癡兒見駭作鼠伏
老我避漏如鴟蹲
何人把釣閒臨水
幾處移秧迨滿村
獨有憫農心最切
欲瞻雲漢拜天恩

螢火

林塘雨餘芳草生
亂螢競飛如自矜
傍衣却照青衫舊

點鬢應憐白髮增數斛散為遊輦火一囊聚作讀書燈
兒童撲得無情甚一抹爭誇月半稜

話舊

話舊忽憶少年事疇昔逢春多賞音長竿釣魚臨水曲
攜酒聽鶯來柳陰白髮幾何渾滿鬢青衫送老負初心
只今尚可須臾樂此後情懷轉不禁

經宜遠樓故址

宜遠樓荒念昔遊斷雲零雨入清秋柳依曲岸溪仍在

蘇合紋楸石尚留百罰觥船春醪酊一篝燈火夜賡酬
登臨倦客皆零落獨向西風嘆白頭

秋日對酒

病骨支離五十過亦知去死已無多綠樽不與黃花共
青鏡爭如白髮何霜後水光饒滴瀝雨餘山色更嵯峨
相逢此景良不惡欲倩蛾眉伴醉歌

醫士施仲模種杏軒

紺芽紅甲兩三畦爭似山房杏滿枝萬樹春花親手植

百年陰隲老天知
蔭垂壇上空聞道
香繞江頭謾紀詩
獨有此軒渾種德
功名留待後人為

送仲謨姪還常德軍中

北風蕭蕭日色薄
歲闌遊子欲何之
此行遠道幾千里
况復思親十二時
巫峽月明猿叫早
洞庭波迴鴈歸遲
經過若向滕王閣
為我登臨好寄詩

求王彥昭菊

寄問西莊王給事
若為一別半年餘
到門誰下留賓榻

金少卿入卷一
把筆還抄種樹書見說深盃猶未怯不知華髮近何如
可能念我秋蕭瑟賸乞黃花映草廬

有懷杭州西湖

不向西湖理釣蓑分明山色與湖波路經鷺嶺峰頭遠
雲傍龍泓洞口多花塢把盃成夢寐竹岡題句定消磨
林逋舊有梅邊約孤負年華奈爾何

感事

腸斷挈家辭故園途窮那敢問蒼天三喪未卜山中壟

十口空耕汶上田
雲散楚臺無舊夢
鶴歸華表是何年
荒林破屋稀來客
風雨誰知絕午煙

夢伯誠姪

懷思只似離羣久
默想方知隔古今
漫有儀容能入夢
更無蹤跡可相尋
仙遊此日歸蓬島
雋飲何年向竹林
老去自來多感慨
不堪觸事易沾襟

澂源虞兄見訪

一別琴書又八年
重來疑是隔生前
君鬚照眼白如許

我齒逢人豁可憐京國官遊無復夢兒曹燈火有殘編
何時却向溪東去把酒論文夜對眠

七夕

七夕涼生枕簟秋故園歸計尚淹留一從蹤跡隨車馬
幾向兒童說斗牛自是馮唐元易老非干宋玉獨多愁
深閨怨女吟紈扇吹笛何人倚畫樓憶得桂堂賓客醉
更來花底按梁州

陸仲游過訪

予連袂陸仲游別去十年洪武二年來訪留連數夕送詩紀別

東蠡維舟又十年重來空記舊山川
死生契闊干戈後骨肉漂零涕泪前
沽酒買羊多慰問檢書燒燭好留連
如何又踏東吳路白髮西風上客船

連日為風雨所困

飄風甚雨經三日茅屋無奈受相欺
翻簷注盎豈能忍大厦高樓渾不知
省事水車歸卧早移家釣艇去嫌遲
男兒未了安身策田里棲棲良可悲

挽曹文茂鄉老

梧葉驚秋自有因霜風行復隕靈椿世間豈少奇男子
鄉里今亡一善人三徑漫荒元亮菊故園空老季鷹萸
年來每墮交游淚此淚於君更滿巾

秋暑

每愁酷暑望秋節豈料秋陽尤更驕君看火雲苦相虐
孰謂金風行可招何處池亭人跡少誰家門徑竹陰饒
便須枕簟眠清書不羨輪蹄趁晚朝

寄舊館人張德祥

詩酒曾同十五年我今顛顛爾茫然亦知久滌相如器不
復歸耕季子田宋國有人收燕石豐城無客斲龍泉交
情若共春冰薄管鮑相看却自賢

聞促織絡緯有感

孰云絡緯最喧聒試聽不類秋虫號機上織梭纔軋軋
車頭綠綫復嘈嘈我方作客貧難倚爾為何人苦服勞
歲晚倘能成束帛幸分尋尺及吾曹

又

緣知促織乃微物感此哀音淚滿裾庭砌露涼應訴恨
沅湘人去未收書青衫不諱饑寒迫白髮潛驚歲月除
回首交游在京國盍因搖落問何如

露坐有所思

清秋獨坐夜沉沉月傍浮雲每帶陰人靜草簷雙杵急
露涼莎徑一蛩吟老逢景運蒙天意貧欲干時損道心
謾有故園歸未得幾回彈鋏思沾襟

中秋

仲秋八月十五夜河漢無雲月自圓天柱峰頭還有客
廣寒宮裏是何年故人憶別應添恨遠戍思歸可得眠
底事高樓又橫笛苦吹清淚到愁邊

湖上

湖上秋深也可憐杖藜常日到湖邊荻花幾處雪初霽
楓葉滿川紅欲燃老去揚雄元有宅歸來陶令豈無田
渚蘋汀蓼相牽挽我欲移家理釣船

對菊

荒村黃菊不知愛而我來看豈憚勞彭澤有人誰送酒
齊山無客負登高任教白日催身世何必青銅照鬢毛
但願對花強健在年年相賞莫輕拋

送仲謨姪自常德移役赴京以醫藥奉職事

老年本自多愁思骨肉那堪在別筵屈指到家能幾日
此行為客又經年禁城花柳恩光近藥籠參苓雨露邊
有弟武陵溪上客幸分春色惜芳妍

聞子義弟預選赴京

鶴怨空山蕙帳寒征衫隨例拜春官蔽塵曾障元規扇
新沐俄彈貢禹冠龐老只聞耕隴上杜陵未始厭江干
瞿塘日夜風湍急切莫中流倚舵著

復寄子義兼簡王季昭

後聞子義此行為有司發遣至京因訴以事蒙恩准

放還山喜而賦此復寄

不向南宮射策勲聖恩特許縱窮鱗乞骸此日歸因病
捧檄當年喜為親築室浣花宜白晝買田陽羨及青春
若逢王翰煩多問十載無詩慰遠人

題仲毅姪煮茗軒

旋拾荆薪澗底歸深清自汲瀹槍斨風生石鼎浪三級
烟護柴門玉一圍多事君謨非易辦求全鴻漸豈忘機
大瓢小杓烏紗帽相伴盧仝到落暉

秋熱

今年七月熱可畏試問老人經見稀祇合三秋多爽氣
翻如五嶺肆炎威祝融秉政忘歸久風伯無言與世違
聞道靈臺冰井好羽翰那得往相依

觀倪雲林惠麓小隱圖有感

二老久為泉下客，舊題圖畫未消磨。
燕泥句好空名在，鸚鵡才高奈爾何。
兩晉風流能有幾，前朝人物固無多。
當時却笑雲林子，尤幸迂疎絕網羅。

寒食祭掃

壟上新松箇箇青，我來祭掃雨初晴。
豐年豈是無歡意，此日唯聞有哭聲。
膝下近歸前日夢，閨中空憶向時情。
一盂麥飯三盃酒，誰與重泉達姓名。

有感寄友

白髮升堂愧俊髦，曳裾應笑事遊遨。
旅懷久負馮驩缺，友誼難忘范叔袍。
斷劍何時望牛斗，遺弓空復念烏號。
南湖歲晚行人少，欲寄相思首重搔。

蠡橋故園有感

禾黍高低遍野田，家園一到一潸然。
向來花竹迷芳榭，今見荆榛蔽斷碑。
賴有故人能話舊，獨憐遺俗不如前。
王維老作漂零客，魂夢時時在輞川。

紅瓢瓜

珍果相傳自汴京南人初識未分明
看來外類碧碼碯剖破中含赤水晶
五色舊聞良有以一杯曾種恐虛名
欲知此品何年出持向青門問邵平

秋後苦熱得雨稍涼

暑當八月猶遺熱風雨今朝喜暫涼
幸得淒清到窓戶不勝沾濕向衣裳
蕭齋夜讀傷時暮南畝秋成報歲穰
千古五湖烟月在一舟歸去水雲鄉

七月三日先妣遠諱之辰痛傷記此

時洪武六年也

憶母南城壽誕歸因看憔悴即驚疑誰知一旦歡迎際却是終天痛別時五載又當初度日百年那得再來期若於地下能相見早入黃泉亦展眉

途經仲兄常翁故居感而賦此

仲兄懷抱從來好苦憶當年候起居小園每傾重醞酒晴牕時寫八分書事同漚滅雲飛後人是生存死別餘欲寄哀吟數行淚九泉無路漫欷歔

種瓜

我欲種瓜消白日竹林南畔是陽坡
初從穀雨培來細直待薰風長漸多
硎谷禍根空磊砢青門隱蔓更婆娑
如何當日唐天子不悟黃臺四摘歌

謝王彥昭惠紫竹杖

所得西園紫玉枝多君贈我要攜持
尚遲同往登高日每藉相扶欲醉時
常掛百錢因換酒曾挑一卷為看詩
青雲失步緣拋爾垂老危途敢暫離

九日

風雨相欺奈爾何杖藜路滑斷經過菊花有約時時發
鬢影無情種種多莫向少年誇俊健且容老子獨婆娑
瓦盆杜酒今朝熟細看茱萸一醉歌

話舊

花月侵階躍紫騮露華香濕粉綾裘笑迎翠袖擎銀蠟
半捲珠簾上玉鉤白髮腐儒今洛下春風歌館古揚州
憑君莫話當年事老夢無情覓舊遊

客中風雨

江南二月多風雨，況是羈愁老病身。
酒觥有時曾入夢，藥囊無日不相親。
誰家吹笛關山怨，何處開花爛漫春。
辜負東園歸未得，漫勞啼鳥勸行人。

病起

病起始知秋已深，閉門良覺負光陰。
看書無力花滿眼，對酒牽愁人在心。
一榻雨聲情脉脉，半簾燈影思沉沉。
廣平幸自腸如鐵，只恐安仁鬢未禁。

哭孫

向哭兩孫猶未已一孫今復喪沉疴暮年值煞逢破碎
豎子坐窮遭網羅醉裏扶攜能有幾閒中抱弄更無多
此生此景不可曉特問蒼蒼理若何

又

老翁喪孫母苦啼與孫不作久相離獨愁殢酒歸家日
怕憶牽裳叫我時梨棗推爭今尚在詩書塗抹迹難窺
人生漫說心如石不信遭逢不解悲

寄仲珉姪孫

西澣溪頭舊醉鄉
習家池館久荒涼
當時倒載容山簡
今日嬉游拍孟陽
岸柳受風纔拂翠
野桃迎日欲吹香
遙憐寂寞東牕下
白髮何如共舉觴

送子還常德戍所

此行送爾還戎伍
得帥今如邵穀賢
遠道重經岳陽路
掛帆直上洞庭船
羣趨幙府深秋後
緩賦驪駒祖席前
男子功名在年少
好將忠義格皇天

寄翟仲謙

履亭先生樂有餘了無榮辱只閒居
綠陰貯得將軍樹
芳徑迂臨太守車
山果飮盤行勸酒
竹牀近水卧看書
就中亦有匡時策
不學相如賦子虛

圍碁

竹院風清人事幽
一枰聊復試紋楸
初疑劉項分疆日
次見孫龐角力秋
計脫重圍還撫掌
危遭深窞只搔頭
何如信手忘機事
勝固欣然敗不憂

送曹本立

浦口東風吹酒醒，帽郎征鼓發初程。
方春花柳安排好，過雨江山分外明。
愛子情深為客易，報君恩重此身輕。
還家莫待重陽節，遍插茱萸共醉傾。

二月六日苦寒

乙丑二月六日風雨交作苦寒逼人入暮復有雷雷止而雪至初七

日方止賦
此以記

二月六日雲陰陰薄暮苦寒俄見侵，迅雷未暇急掩耳。
飛雪忽驚還滿林，天神調戲竟莫曉。桃李無言那可禁。

金
老
豪家只作豐年賞誰念空街凍餒心

憶西湖舊遊

憶向西湖放酒船兩峰如畫雨晴天魚吹細浪隨移棹
燕接飛花近綵筵遊賞總教同往日樓臺應不似當年
金魚別後無消息我欲貽詩問玉泉

求菊錢

聞道君家菊滿園黃如金盞白如綿不嫌村巷還居陋
移種柴門良可憐常醉劉伶還有酒棄官陶令本無錢

自知老病風霜後
賸餘芳欲引年

三華集卷一

欽定四庫全書

三華集卷二

明 錢子正 撰

綠苔軒集二

七言律詩

舟中夜坐

未上孤舟思已迷
轉篷蹤跡更依依
亦知離別古不少
似此漂零今所稀
野曠星河垂著地
夜深風露冷沾衣

天涯見說多岐路萬里羈愁何處歸

旅舍不寐

破屋頽垣倚敗牀不眠愁絕思如狂
非唯骨肉皆零落復計交游半死亡
稚子生離猶戀戀老妻死別已茫茫
終宵幾種酸心淚灑向青銅作鬢霜

經故苑

樓閣曾聞貯翠娥五雲深處出笙歌
人間富貴莫與匹天上繁華爭幾何
華表鶴歸非故國槐根夢省識南柯

從來赫赫須臾事門鎖封題雀可羅

哭亡妻

辛苦相從三十年恨無鳳嘴續危絃偶逃離亂雖多辛
每念經營實可憐歸夢只同平昔事此身難結後生緣
西風漫灑千行淚不解吹將到九泉

仲益姪錄事攜家潁上回

寄問歸來錢錄事僻居風雨近何如不似阮生貧好酒
却作虞卿窮著書傍舍好栽彭澤柳移家莫戀武陵魚

池塘此日生春草杖履時來要起予

又

公事痴兒不易了我復白頭樗散材新春濟叔苦多病
今雨阿咸渾不來岸柳引條成翠縷草堂無客自蒼苔
若為定省乖閒日過我柴門試一開

雪

風定寒雲晚更低散花天女播芳蕤行經庾嶺梅開日
路入隋堤絮舞時驢背何人詩更好壚頭有客酒相宜

却憐閉戶高眠者何似長安衆富兒

子原炳戍寶慶久無書

憶爾臨岐莫可留往趨戎伍戍邊頭三年不得半行字
六口今遺兩地愁巫峽啼猿聲徹夜衡陽歸鴈影橫秋
莫因時序驚離別老放營農有故丘

孟明允見訪

時為王府
審理官

二年趨直向承明一日垂閒下草亭野飯溪魚纔箇箇
映門楊柳恰青青故人習慣忘加拜公子論文醉六經

肯與南湖尋舊約白鷗元不占沙汀

送孟明允往湖南

明允是年秋又挈累往湖南之山居暫止以詩送行

秋水無痕見白沙棹郎催發鼓頻撾身閒身健休論客
湖北湖南總是家對菊山居誰共飲見梅客路好將花
故人問我君應說錢起龍鍾兩鬢華

亂後見牡丹

南湖兵火池臺廢國色天香事變遷話舊故人能幾在
此花重見倍淒然魏家宴後名空說洛苑荒來種浪傳

千古只今同一慨莫因相賞嘆流年

雨中元夕有感

孟春正月十五日憶得錦城元夜時醉引少年驚客座
狎從遊妓覓花枝暗塵處處青驄馬明月沉沉金屈卮
欲與梅花話疇昔暮烟疎雨不勝悲

王敬德惠筆

時為王府審理
權刑部郎中

京國霜毫價並琛憐君寄遠意何深分無蜀地新蟬翼
曷副宣城舊棗心只合省郎留起草不應野老亦分金

自慚得此才難稱擬送相如寫上林

秋涼

天末晚風吹白蘋忽驚涼冷入衣巾已拚短髮蕭蕭白
其奈閒愁種種新深巷故人蹤跡少老年急景去來頻
無錢只博身閒健留向黃花作主賓

孟叔敬自浙東回惠山

故里停驂息駿奔清泉聊為洗塵氛論交賴有通家譜
覲面慙無責沈文林下宰官今復見山中風月好平分

漢庭賢相開東閣未許心灰百不聞

子義弟惠茶

未展槍旗摘社前手題封裏寄芳鮮
露芽便合偕蒙頂活水還當汲惠泉
評品已無鴻漸試捧嘗何待綠珠煎
文園不用愁多渴啜罷乘風訪玉川

題江陰明霞觀

相傳此觀有古井石闌乃瑞物向來時時遇夜有光如霞自井中出

趙宋時有產婦踞井汲水從此不復有光矣

城南勝地梁朝觀三月遊人也自忙古井汲來猶有水

明霞散盡更無光
隔溪楊柳圍茅屋
幾樹桃花倚石房
欲向芭蕉題歲月
却嫌憔悴怯秋霜

挽惠宗迪表姪

賢如迪也宜多壽命
矣天乎不假長文彩
未侔何水部腰肢
先學沈東陽梁園
蒲柳零秋早謝砌
芝蘭怯露涼我欲
與君招斷魄世間
難覓返魂香

題鄒惟久齋

雅愛高齋向竹林
又添上番轉幽深
半窓涼月揚雄宅

一榻清風宓賤琴翠鳥近人時並宿白魚留客見歡心
多君不斲穿堦笋許過東家共綠陰

櫻桃

江南四月櫻桃熟壓樹駢枝箇箇圓色比丹砂饒瑩澤
味方崖密更甘鮮退朝擎出從霄漢入藥嘗來記簡編
却笑明光空自種文園病渴已經年

賀徐伯凝知府致政榮回

彤庭對策天顏喜列郡分符地勢雄不獨詩章偕庾信

須知德化若文翁一麾出守人能及五馬還家衆莫同
想見拜恩朝下日送車千輛國門東

喜虞澂源先生赴蔣文壁館用寄無簡文壁

三逕竹深懷蔣詡八篇書就羨虞卿久聞北道求先進
今喜西齋得老成夜雨半簾搖燭影春風一榻讀書聲
敲門不禁頻相過杖屨從茲管送迎

柳

手種庭前楊柳樹千絲萬縷已垂垂恰似小蠻初舞日

還如張緒少年時也因窺客傳青眼生怕離筵歛翠眉
憶得醉歸簾半捲倚闌紅亞小桃枝

挽孟季成同知

四世論交老弟兄姻聯重訂佩心銘方收絕海題珍翰
忽報重泉掩夜扃錦里晝歸空駟馬綺窓秋冷入孤螢
唯應仁壽堂中客宿草芊芊有淚零

又

同是庚申愧不辰文塲猶記策微勲青雲路穩將攜我

白玉樓成已召君郎署典刑遺古老相門謀畫障諸軍
我來慟哭西州路零亂空山日暮雲

挽公叔侄知縣死任所

朝拜春官入禮闈莫辭黃閣領除書擊強正擬任棠蔭
騰謗翻疑馬援車益博令名今不愧士衡才俊昔何如
大招不忍歌來些一弔羈魂淚滿裾

次潘信之韻

遠辱緘題問起居此身雖在百無餘莫論懷抱今何似

為報形骸總不如君才舊擬潘縣令我病適同焦校書
何時肯發蘭陵棹乘興相尋過草廬

挽彥可兄

時洪武九年遭
註誤繫獄而卒

哦松亭畔銜盃別種栢臺前旅櫬還楚客只知誇燕石
鄴城無計斲龍泉如公命矣成蹉跌此老天乎忍棄捐
獨有北堂雙白鶴怨聲時徹九重天

又

湖海元龍志未降謗成市虎枉行藏人皆身沒一杯土

公獨名存百鍊鋼歲在龍蛇終遇厄神騎箕尾孰云亡
我來痛哭宗盟冷誰與寒灰起燄光

送蔣伯庸應知識薦

人向沙頭送客船孝廉此去早朝天貢公正是彈冠日
毛義方當捧檄年漠漠晚煙深別恨蕭蕭行李半詩篇
只今治劇須才俊咫尺聲名在日邊

題杜工部祠

耒陽江路草紛紛工部荒祠跡尚存牛酒一時傳謗口

藜羹千古拜空墳
浣花溪在今無客
背郭堂成昔有孫
不是艱危能奉主
當時誰識帝王尊

仲毅姪還家因風雨久不至館中

厭見蕭齋風雨多
束書歸去自委蛇
逕無冗客惟青草
門近南湖有白波
睡起自歌能欸乃
酒闌漫舞更婆娑
空憐病叟多岑寂
不寄新詩意若何

次華彥明以詩來慰問韻

幾向僧房共酒樽
當時懷抱得評論
六年事往成塵跡

此日詩來慰斷魂
棋局可曾敲夜雨
絲桐漫憶聽春溫
舊遊萬一題名姓
為說棲棲久杜門

寄仲毅姪

枕下南湖浪拍天
閒雲處士慣高眠
晴光出屋籠丹火
香霧縈簾煮茗煙
短杖每臨芳草渡
綠蓑時向釣魚船
新詩莫詠玄都觀
怕有交游却浪傳

挽蔣伯庸

曾舉賢良達帝京
聖恩天覆聽陳情
方期親老供三釜

豈意仙遊赴五城北海座空誰得醉西州路冷恐重行
老年數墮相知淚愁向交游說姓名

挽鄒惟久

只今鄒魯文章在亦數斯人舊典刑方喜地聯高士宅
豈期雲掩少微星無官身自崇天爵有子心能醉六經
若使中郎今日在佳城不愧立碑銘

遊惠山寺有感

泉聲山色固依然勝跡蕭條足可憐但有茅簷依綠樹

更無芳沼著金蓮
李紳遺址烽烟後
陸羽荒祠草棘邊
欲把一樽重弔古
寺僧誰得話當年

寒食有感

湖上春晴物色新
岸花堤柳鬪精神
好天佳景有如此
樂事賞心無幾人
上塚盡修寒食節
招魂誰弔不歸身
衰年何限興懷抱
獨向東風淚滿巾

賀陳士弘納杭寵善箏

歌舞西湖觀未足
明珠買得啮春鶯
遊人莫訝貪為樂

公子從來不治生，花壓繡簾春。二月箏收銀甲，夜三更。
後堂定有疎狂客，應賦高唐醉眼橫。

友人新置妓

過於昵愛
以詩調之

侍女芳年恰破瓜，仙郎詞藻富才華。莫辭金帳羊羔酒，
絕勝紅爐雪水茶。壁月在，天長似鏡瓊枝無日不開花。
司空故是尋常事，試數東吳得幾家。

寄子義弟久別

兄弟睽離亦可憐，黑頭漂泊總華顛。弟今落落依黃卷，

兄實棲棲守墓田水北有花荒棣萼天南無鴈少詩篇
合評此後桑榆景歲一相看得幾年

百花洲

姑蘇臺下百花洲曾是吳王漾綵舟桃李開殘荆棘變
鳬鷺飛去鹿麋遊卧薪久蓄窺窬怨賜劍翻成報國囚
又向闔閭城下宿斷雲零雨不勝愁

贈術士張栢庭

乃父號松隱

隱士松間已化仙茯苓此日大如拳青囊有子傳先業

白髮逢人說後天
潦倒自知臨暮景
行藏猶待卜流年
幾時去訪支機石
同向成都住一廛

寄仲毅姪

處處移秧已滿田
蛙聲偏聒夕陽天
叢林地濕惟多熱
卧病人稀只欲眠
久覺素餐諳市遠
本無高館可招賢
幾時重剪西牕燭
夜雨連牀說向年

元夕雨

風雨蕭蕭上元夜
孤負錦城遊賞人
漫有遠香飄紫陌

更無明月逐朱輪
水生菜渚挑應濕
春滿梅枝折未頻
自嘆白頭狂阮籍
不知佳節坐常貧

顯慈僧舍如斗軒

盡愛西林新剏屋
我來常是得盤桓
日當牕戶冬偏煖
風動松筠夏亦寒
僧有遠公堪入社
交無陶令孰休官
此軒莫訝渾如斗
萬象秋毫一理觀

病中寄醫師徐士廉

每憶城南有道徐
經年蹤跡竟何如
不知抱病多寒暑

漫向行人問起居種德試看栽杏圃濟生時著活人書
莫言地僻相過少便道終迂長者車

端午

看到葵榴已著花老逢佳節惜年華粽遺益智誰曾得
酒泛菖陽俗漫誇草樹有靈多入藥身心如寄只思家
武陵湖上承平事標奪龍舟鼓亂槳

劉某居西神山圖

九隴蜿蜒龍入雲公將結屋向西神好憑泉洞瞻鴻漸

何處書堂問李紳盤谷可能留隱士鑑湖端合著詩人
山靈聞道虛前席已許煙霞作主賓

為鄒士文賦林塘幽

杜陵曾住浣花溪之子林塘即瀼西苔逕不教官馬過
柳橋隨處野鷺啼鉤簾秋雨敲棋局攜酒春風繞杖藜
羨爾已尋棲隱計自慙勞苦聽朝雞

夢亡室

昏昏午睡見天真似訴今生未了因白骨久為泉下土

深閨猶是夢中人已無故篋遺香被漫有荒奩鎖暗塵
七十老翁非遠別不須揮淚重傷神

西庵蓮池為月可庭賦

半畝方池近佛廬我來乘興看芙蕖只疑映日張雲錦
何似凌波曳翠裾博士千壺優給俸真人一葉卧看書
分無官守無仙骨飽裛香風樂有餘

送人之京待除

江堤楊柳欲飛花江浦離舟鼓待撾別酒未須辭祖席

掛帆此去宿誰家
亂山日落牽清夢
千里波明見白沙
頻向天涯寄消息
莫題鸚鵡動京華

復贈張栢庭

張公一生滄海客
高尚不肯干王侯
篋中珪璧幾千載
舌底風雷半九州
遁世君今誰得擬
拈括囊我亦復何求
闔閭城東有艇子
好拂珊瑚把釣鉤

壬戌元夜

禁城入暮多歡飲
況是元宵啟夜闌
幾處樓臺燈影亂

誰家池館月明間
翠裙映座招遊騎
絳蠟迎門列舞鬟
貧病老翁無所事
強將樽酒一開顏

燕子

燕子雙飛為底忙
泥融花老惜年芳
靜依羅幙窺春睡
偷入朱簾妬曉粧
人別畫樓塵漠漠
霧迷滄海路茫茫
相看只作須臾客
又向西風促去裝

題顧子玉處靜齋

之子高齋名處靜
遂因斯扁見茲心
誰言蹤跡居喧市

我識情懷寄遠林花雨半簾春對酒篝燈一榻夜鳴琴
敲門若問楊雄字室邇人遙不易尋

癸亥九月初一日子義弟誕日時宜興官學開館
與爾當時永著冠綵衣膝下共團藥年隨過電俱投老
人隔重湖失所歡擬折棟花將頌禱先憑綺語問平安
祝君宜壽宜茅屋莫厭閒身作冷官

九日有懷澄江諸陳

陳家銀瓶三尺高重陽宴客貯葡萄糗糒花餌多無味

錦帶吳鉤有俊髦
人事別來俱寂寂
江波東下自滔滔
白頭今日西風裏
羞向黃花舉濁醪

中秋

一年良夜中秋節
投老翻嫌月自圓
玉兔只供天上藥
彩鸞難續世間絃
何人把酒酬佳景
幾處悲歌送別船
我亦漫思追往事
坐沾清露不成眠

九日

齊山勝賞名空在
此日何人繼舊游
對景未須論往事

相逢聊復醉清秋
菊因雨後香微減
蟹傍霜前味更優
多少天涯不歸客
畫簾空捲夕陽樓

有感

雙袖龍鍾老布衣
謀生計拙轉堪悲
身同范叔貧誰解
病比相如渴自知
薄暮餘暉聊共惜
五更春夢不多時
長生欲學燒丹術
只恐流年已較遲

岳王墓

感慨忠良萃一門
聲名千古動乾坤
大姦力肆欺公議

巨寇身沾再造恩
麟塚已嗟銜怨骨
龍沙猶有未招魂
至今寂寂西湖路
時見愁雲蔽日昏

京師見異域進名馬

驥子曾聞出大宛
世間良馬總虛傳
不因虎將臨西域
爭得龍駒到九天
身帶五花真汗血
蹄輕千里感雲煙
太平天子東封日
穩飾鑾鈴玉輅前

暮歲

荒村忽忽歲云暮
自覺老懷悲壯心
畏冷北風時帶雪

向陽寒日易為陰盤殮市遠常蒞韭楫杻煙深欲爨琴
幸近新春換殘臘獨因憔悴動哀吟

春朝

春日春風吹酒旗山翁興在習家池冰消南浦魚先覺
煖入東園蝶未知柳色漸黃能幾日梅花渾白已多時
玉盤翠縷無消息寂寞樽前有所思

聞鄉人葛桓擢詩科擬贈

昭代蜚騰屬後人南宮戰藝捷書頻曾聞首榜登龍虎

不獨中原出鳳麟
萬里雲霄搏羽翮
九重閭闔拜絲綸
願言莫負多才選
收取聲名達紫宸

懷惠山

何處春光最可憐
蓮蓉溪上惠山前
梨花照水散晴雪
柳樹繞堤生煖煙
神廟乞靈香蠟社
泉亭留客綺羅筵
而今景物都非昔
一度逢時一愴然

欽定四庫全書



三華集
卷二

十八

三華集卷二

欽定四庫全書

三華集卷三

明 錢子正 撰

綠苔軒集三

七言絕句

題鷹兔圖

天外蒼鷹雙眼疾
草間狡兔一心忙
平生却笑營三窟
臨事孤身不解藏

楊柳

楊柳條長翠縷懸東風吹拂欲生煙
清明切莫家家折
留取飛花送客船

漢丁公

兩賢當日不回戈
隆準無因脫網羅
若使受刑知國體
合將項伯罪同科

促孟蕃送笋

孟蕃不見送笋以詩促之

年年餉我西園笋
今已春歸不寄將
傳語春風好拘束

莫教吹拂便過牆

題明皇幸蜀圖

金盆新浴腹便便
纖手曾煩滌素泉
試問翠華西幸日
君王應賜洗兒錢

絕句

簾捲青山恰晚晴
高荷修竹有餘清
南湖只隔前村樹
何必滄浪可濯纓

又

住近湖邊常怕風風狂高浪有蛟龍若為移向山中住
狼虎無因不見容

又

屋頭楊柳若圍屏纔看飛花日漸零安得此身同此樹
春風吹拂又青青

又

積雨乍晴還復陰綠楊門巷午沉沉欲拈拄杖東家去
無奈春泥一尺深

放他明月十分明

登瀛洲圖

天策將軍百戰餘
大開文館衆賢居
却憐天祿無英俊
空著揚雄老校書

九日懷蔣伯庸

去年九日曾同會
綴席茱萸醉舉觴
今日君爲泉下客
菊花空復報重陽

辛夷花開有感

舊居子敬弟西亭向曾同醉賞辛夷花今幾三十年同賞之人二三

從軍復有亡者亭已廢久花猶在焉
即今盛開事已非昔故有感賦此

西亭曾賞辛夷樹亭已無蹤花漫開
忽憶當年同醉客
天南天北不歸來

村居

天上紛紛種白榆仙人屋宇畫樓居
老夫繞舍栽楊柳
時聽啼鶯卧枕書

題烏江圖

周鼎逃秦漢已移拔山威力竟何施
皇天厯數俱前定

不在陰陵失道時

南湖

五月涼風湖上多
向來持酒聽漁歌
不知好事今誰在
孤負扁舟與釣蓑

又

桃李春風桂子秋
湖南景物似神州
當時耆舊消磨盡
空向兒童話昔遊

句容道中

憶向歌樓倒碧壺
醉歌烏帽要人扶
而今獨酌旗亭下
何處高陽舊酒徒

有懷遠人

柳條青青芹吐芽
遊子遠在長風沙
東風不分天南北
滿眼春光不是家

又

欲折梅花寄隴頭
一枝聊復慰離憂
天風一夜吹還盡
無限相思不自由

夜寒

初冬便有深冬象
雲意模糊欲雪天
誰省白頭南郭叟
布衾如鐵未裝綿

過採菱港

採菱溪上泊行舟
本為溪菱少駐留
菱角藕花渾不見
岸藤汀草不勝愁

蒲萄

擎來顆顆堆盤滑
折處累累作穗香
釀得酒成甜似密

肯將一斗博西涼

芭蕉

自愛牕前景物清
芭蕉誰謂最無情
道人心耳相忘久
一任西風挾兩聲

紀信詐降圖

萬里山河漢業隆
滎陽失勢計將窮
黃金空付陳平用
鑄印誰鐫紀信功

中秋無月

幾年空負中秋月身似驚鳥未定棲今夜故人期勝賞
廣寒深閉雨淒淒

招客飲

白酒黃雞公事畢碧梧翠竹小亭幽阮生朱老都無恙
正好同來一散愁

酒醒

虛庭寂寂初零露高樹瀟瀟已受風晚醉半醒眠未得
竹牀歌枕聽秋虫

獨酌

不信南牕六月寒，天風多在碧琅玕。
自割素鱗傾白酒，抵須纖手水晶盤。

招飲不赴

早稻花開風送香，家貧可望宿春糧。
直須賴上輸官了，次第相從入醉鄉。

初涼

水沉煙冷博山香，竹院人稀睡思長。
風送斷雲分暮雨，

破除殘暑作新涼

芙蓉

臨溪越女如脂貌
照水芙蓉似鏡花
何事渡頭癡絕客
相看惆悵却還家

秋後

秋後陂塘蒲葦荒
郊園落木不禁霜
洞庭想見多柑橘
誰摘纍纍滿樹黃

過西泚故基

猶記當年醉竹林半開桃李正春陰于今風景渾非昔
人自仙遊碧草深

冬夜有感

朔風吹冷逼衣巾況是淒淒老病身夜半高樓絃管發
不嫌遺響動比隣

屢空

病入衰年百事慵誰憐餬口逐西東
鄧攸莫怨終無後
不見詩人詠凱風

瓶中海棠

瓶插花枝不久長
暫時顏色暫時香
須知到了無根柢
莫怨東風不主張

九日

紫萸黃菊曾同賞
檀板歌鍾憶醉鄉
今日風光那得似
震雷狂雨做重陽

春日早起

小桃花破紅初染
垂柳條長綠未齊
我為惜春常早起

不因朝馬待雞啼

春暮

紫楝花開春日長
萬紅落盡燕泥香
赤闌橋畔無人過
看得啼鶯在綠楊

懷故園

野棠亂開籬落花
東風隨處識年華
數聲布穀驚春夢
湖上歸耕有幾家

苦雨

一春已厭無情雨四月何當雨更多肯信道人茅屋底
移牀終夜欲披蓑

又

西蜀曾聞有漏天南州今雨亦綿綿太湖莫駕排空浪
誰倚龍驤萬斛船

七夕

瓜果中庭列酒樽謬隨兒女拜天孫近來機巧多成害
願乞從今拙滿門

浮槎

雨滌風搜不計秋
岸崩根絕聽漂流
張騫去後渾無用
誰泛天河犯斗牛

早起

昏昏睡裏酒猶酣
燈下兵符要早參
舟子逼人和夢起
五更衝雨過城南

干將莫邪

匣裏雙龍不計年
空勞獄底閉蜿蜒
無人為倚高樓望

一夜光芒漫燭火

落花

春去無情是落花
漂零只合委泥沙
不應借得東風力
從此吹將過別家

惜春

澹紅深白開都好
只恐狂風樹樹飛
呼酒便須花下飲
爛燒銀燭夜深歸

又

拍堤漲起桃花水入暮寒生楊柳風不覺一年春事了
未成歡賞又成空

小酌

映水山光侵戶早亞枝花艷傍簾多何人有酒身無事
不向青春一醉歌

斲筍

日向籬邊斲竹萌兩經春雨一時生長鏡急倩鉏烟霧
莫待東風脫錦綳

宿富安田家

富安邑西地名也癸亥十月十二日即事

夜宿荒村睡未牢打門有客忽呼號
尋知縣發催租吏何異當時舊石壕

食笋

偶牽逸興山中宿四月江南笋蕨鄉
得與野人同一飯玉堂空說太官羊

初夏

移居住近西河畔無數垂楊臨水傍
翠幙穩遮黃鳥囀

行人疑是謝家莊

清明

插簷楊柳綠遮門
正是清明雨後村
桃李滿前花似錦
不知何事暗消魂

送陸仲遊還鄉并寄乃子

堂下郎君送別時
奉觴應祝歲闌歸
還家恰近陽生日
江上霜餘蟹正肥

又

白髮椿翁若到家好將檀板進琵琶綵筵更著斑衣舞
何必春風宰絳紗

送子原炳發無錫

時丁未九月十八日也

征帆催發鼓如雷那得離人却挽回骨肉便成生死別
若為肝膽不傾摧

戴帽

所戴之帽不入時
宜為道路指誚

闕下行人不可留山光水色送行舟丹陽郭裏無相識
盡指南冠是楚囚

子別赴京城

秋風黃菊向誰開
應笑行人為底來
明日孤帆無覓處
碧雲深鎖鳳凰臺

題聽雨軒

孤寺空堦秋滴滴
潤花滋柳夜瀟瀟
牕前忽作敲蓬響
憶在吳淞第四橋

寄常德子原炳書不到

十寄平安九不收
世間誰是置書郵
長江好送相思淚

流到潯陽向上頭

寓埭橋

桑乾水冷人迢遞回鴈峰高路渺漫幸在曹湖西畔住
可無一紙問平安

不寐

荒村薄酒不易得其奈照人明月何客枕夜寒眠未就
起乘風露一悲歌

困乏戲作

顏公乞米曾書帖杜老求錢解賦詩却笑棄官陶靖節
寂寥空把菊花枝

又

曾因齋粥憎王播又為檳榔誚穆之薄俗至今無具眼
逢人何必訝當時

絕句

湖海風塵入鬢毛歸來燈火對兒曹道人不是封侯骨
錯把黃金鑄寶刀

又

芳草遠連官渡碧
好花斜倚夕陽紅
莫將投老持盃手
輕向天山掛角弓

又

瀟瀟風雨暗孤村
曲突無烟午閉門
壕吏不知懷抱惡
到來猶自索雞豚

桃花

天桃滿枝春日妍
臨溪疑是武陵源
東風幸莫相拘束

為我吹香到故園

偶題

陌上垂楊綠未多
岸頭新水欲生波
旗亭酒熟花初發
如此春光奈爾何

憶子

一夜東風欲捲沙
今朝流水送桃花
衡湘此去三千里
春盡行人未到家

即事

村巷吹殘紫楝風
綠秧如織正芄芃
江南四月黃梅雨
人在溟濛霧靄中

愁絕

南湖四月黃梅熟
風雨溟溟暗遠村
掩卷獨眠煙火寂
閉門誰弔欲消魂

題遊月宮圖

清虛臺殿月中間
誰引君王共往還
記得羽衣天上曲
却煩經過馬嵬山

喜月

夜深雲盡月當空
桂影分明在眼中
安得仙人王子晉
吹笙同到廣寒宮

題畫

冠蓋紛紛滿帝京
桐江獨把一絲輕
當時附鳳攀龍客
不似先生隱姓名

又

不廢行吟復負薪
可憐愚婦苦嫌貧
誰知駟馬重來日

便是當年朱買臣

題牡丹手卷

醉臉朝酣暈玉團半欹應怯露華寒沉香亭畔東風裏
銷得三郎盡日看

又

令公宅裏千葉紫天寶年中一捻紅此景此花誰認得
試憑圖畫問東風

送別劉伯喜

黃帽催人發棹歌溪頭送別意如何南湖故舊如相問
為說年來白髮多

有客

有客荒村恒苦饑敝冠憔悴不勝衣十年屋底埋頭坐
不信將軍食肉飛

木芙蓉

溪上芙蓉已著花秋深開近老夫家荒村初不煩妝點
自與西風表歲華

明鏡

明鏡不嫌增白髮
衰年自覺減青春
相逢莫厭盃中物
榮辱都來一聚塵

秋夜

槿花籬落露泠泠
泣露秋虫箇箇鳴
萬物自能知節序
白頭惟覺昧平生

絕句

南湖不是荆江水
生女如何白似酥
手把筐籃採桑葉

世間方信有羅敷

又

隣屋度香知酒熟釣竿垂重覺魚肥山妻稚子相牽挽
底事行人不賦歸

又

採薇南圃按藍重酒壓檀槽滴玉渾一夜雨聲春半裏
江頭新水上河豚

又

憶向江邊踏早春
江頭龍廟正迎神
社官都是西江客
蠻語長衫笑殺人

春雨

小院陰陰雨欲來
畫闌紅紫正爭開
明朝試捲湘簾看
多半芳香在綠苔

自笑

自笑山翁老耐嗔
從教好酒惱比隣
不知仲叔辭安邑
可是猪肝解累人

送人入越

若耶溪畔定經過為問荷花近若何應是採蓮人折後
碧雲紅錦更無多

寄舊隣李用中

六載空歌遠別離當年只隔水東西白頭老子風流盡
抱甕年來學灌畦

鶴瓢

因形稱鶴初非鶴以類名瓢未似瓢定是道真留別種

不妨貯酒杖頭挑

燕

繡幙珠簾面面開
結巢只合向樓臺
也知好處棲難穩
却傍茅簷草舍來

感舊

載酒無人能問字
打門有客為催租
知章老去風流盡
孤負春風舊鑑湖

水樂軒

軒下元無筑與琴非金非革儼成音欲知此調從何得
試向龜茲國裏尋

寄賀彥文

曾憶清溪棹酒船遠尋賀監共留連如今此興都消歇
一望稽山一悵然

採桑婦

白髮攜筐氣力微陌頭辛苦採桑歸東隣女伴梳粧了
笑剪春羅作舞衣

有感

雞母護雛常逐隊沙鷗成伴每追飛
人生何苦多岐路
天北天南各未歸

題畫

好鳥飛來恰一雙
柳間花底占春光
多情不及梁間燕
常向紅樓妬曉粧

又

午睡醒來暈臉霞
合歡團扇弄冰紗
內園盡日無人到

閒向東風撲柳花

又

曉怯清寒淺帶顰翠翹微躡不勝春石家舊日珊瑚樹
留與君王賜近臣

雨

一夜雨添溪水深臨溪高樹靜沉沉落花不復留春色
處處園林是綠陰

求菖蒲

聞道昌陽已吐芽淺依拳石淨無沙道人若肯分清供
歲晚同來看著花

寄仲毅姪

寄問郎君近若何捲簾秋浦雨聲多採蓮歸棹蕭蕭暮
莫為黃金換綠蓑

又

南浦晚風吹藕香小槽白酒瀉天漿誰人得似溪邊客
醉裏番嫌六月涼

又

小院竹林今若何
定知清影接湖波
幾時拄杖尋茅屋
箕踞蒼苔一醉歌

雨中客至

八月雨多秋氣寒
身閒無事不曾冠
客來攜酒衝泥濘
起坐蓬牕一笑歡

戲題

採蓮女兒十五六
綠荷遮雨濕紅粧
唱歌蕩槳自歸去

却笑行人著眼忙

酷熱

酷暑著人如病酒
靈臺冰井去無因
翠寒堂上涼於水
欲問當年召對人

伯剛姪墨梅

姑射仙人玉作肌
瑤池燕罷不知歸
醉中誤入林逋宅
從此緇塵染素衣

沍寒

陌上霜風凍裂衣
錦裘公子醉中歸
華堂却厭如春暖
半捲紅簾看雪飛

題唐明皇擊梧桐畫

霓裳舞徹翠鬟低
按樂君王擊節遲
不道就中勞聖體
鳳凰枝下立多時

又

鳳翹微軀半含羞
玉筯輕敲碧樹秋
分付梨園休進樂
大唐天子按梁州

寄題光福徐良輔耕漁軒

春風滿袖扶犁早
細雨回舟把釣遲
不是道人生計拙
玉堂無夢已多時

送別

江上垂楊映綠波
江邊送客奈愁何
離歌未了征帆發
從此雲山入夢多

狂風

破屋自是不容身
十日狂風吹倒人
恨殺屋頭花滿樹

半隨流水半隨塵

初夏有懷

映牕煖日朱櫻熟
隔浦微風杜若香
忽憶遠人書未到
鴈聲元不過衡陽

懷亡姪伯誠

山翁日日醉如泥
街上兒童識馬蹄
野鳥不知人事改
數聲啼過畫橋西

踏青

金勒並嘶紅叱撥玉纖輕惹紫檀槽東君可是貪粧束
一樹垂楊一樹桃

三華集卷三